



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8



Manipur nung Loktak Lake
renlokdaktsüsü: Sarbananda Sonowal



2023 elections sülen mitkartem
politics nungi ainshitsü: Al-Burhan

VOL. XIX NO. 59 (ADOK 59)

DIMAPUR

TENTONÜ (MONDAY)

LUCHII (DECEMBER) 06, 2021

₹ 5.00

Nagaland sorkari SIT tentetogo MON NUNG CURFEW BENOKER

Dimapur, December 5, 2021 (TYO): Mon district kübok Tiru aser Oting yimtem tsüingda nisung khasetba bushisüngdangtsü atema Nagaland sorkari Special Investigation Team (SIT) ka tentetogo.

Iba dak sendakba FIR ka Tizit Police Station nung benoka lir saka ibaji State Crime Police Station (SCPS) dangi abener aser SIT ajanga bushisüngdangtsü, ta Nagaland Chief Secretary, J. Alam, IAS-i sangdong ka nung ashi.

SIT-i iba ken o tanü nungi bushisüngdang tenzüksüla aser lendong atalokba tesem semdanga kulitem bendentsü ta Deobarnü Home Department-i metetdaktsüogo.

SIT nung züngsemtemji Limasunep Jamir, IPG(R), CIO, Roopa M, DIG (CID), Monoj Kumar SP(Crime), Kilang Walling, SP aser Relo Aye, Deputy Commandant, 15 NAPIR nung aser aser parnokki ita ka tsüingda bushisüngdang tembangtsü ta Home Department-i sangdong ka nung ashi.

Sandep M Tamgadge, ADGP, Law and Order lenisüba kübok SIT-i bushisüngdangba maparen inyaktüsü.

SIT-i Police Department nungi züngsemtem shimoka inyaktüsü akok, ta sangdong nungsa shia lir.

Ano, Mon Deputy Commissioner Thavaseelan K, IAS-i tanga sangdong ka nung Mon jila nung curfew aliba osang metetdaktsüogo.

Mon district nung Law and Order tiptema ayutsü atema Section 144 kübok CrPC 1973 ozüing agütsür. Iba ozüing ajanga nisung 5 den teimba adenshiba noktanger aser passenger garitem dena non-essential garitem mesenzüdaktsüsü, ta Mon DC-i sangdong nung ashi.

Iba tenokdangba kübok District Administration, Police, Para Military Forces, Magistrate on Duty, Doctors & medical staff aser emergency service nung inyakterem madener, ta DC Thavaseelan K-isa metetdaktsü.

NSF-i Naga nunger lushi ajak mokdang

Kohima, Dec.05 (TYO) : Naga Students' Federation (NSF) telokia Assam Rifles sepaitemi Oting nung tai maketba Naga nungertem kasetba mapa tamajung anema December 6 anepdang 6:00 ako nungi anüingdang 12:00 ako tashi Naga nunger lushi ajak mokdangtsü

sangdongogo. NSF telokisa Nagaland government dang Hornbill benjongmong mongya aliba ya anentsü aser Oting nung atalokba indang jembitsü atema rongdak tatar senden ka jateptsüla ta takangba agütsüogo.

Tanü Dimapur anogo piyong shibangtsü

Dimapur, December 05 (TYO) : Yashi Küptok nü nikonngdang Mon district nung Oting nunger kecha tai makaba purtem Assam Rifles purtemi kasetba mapa tamajung anema tejashi sayua December 6,

2021 anepdang 6:00 ako nungi nikonngtsüsü 6:00 ako tashi Dimapur nung shishilembadak tesem ajak shibangtsü ta Dimapur Chamber of Commerce ajanga metetdaktsüogo.

AMC Dibrugarh nung nisung 2 anioka lir

Dimapur, December 5, 2021 (TYO): December 4, 2021 nü Mon district nung yirur ana AMC Dibrugarh nung anioka lir. Tena ya Indian Army-i anir arua casualty room nung yutsür ao.

Tena ya kanga mejungi yirua lir aser nisung kati o tera jembitetba agi pa dang asüingdangya asüingdang pai tena indang maitsü metetdaktsü. Pai ashiba agi tena ya

Wanghein'er jabaso Sheiwang aser Jim Kha'er jabasa Yeiwang lir.

Tena rongnung Yeiwang ya 'emergency head operation' agütsüba tia ka nung lir anungji tsürabur mesüra kinungertem NCF Dibrugarh Pastor Dr. Bendangjungshi (9402772222) mesüra Student Advisor Dr. Kape (7085982466) den tongteptsü metetdaktsüogo.

AO BAPTIST AROGO MUNG DANG (ABAM)

Dated Impur the Dec. 5, 2021

AMANGBAPURTEM AJAKI PEI ALIBA TESEM NUNG SARASADEM TSÜ MEPISHIR

Temeimba adianutem,

December 4, 2021, Mon District nung Sepaitemi Oting yimer tepsetba dak sendakba nung tasürtem asoshi mang ayimer. Pei kibong aser taküm mesütsü asoshi anogoshia asentzü sena mapa inyakterem paikaji mapayui kasetba angashidang temlung ayanger. Ano iba area nung tena tamajungba kuma aoba osangtem angazüker.

Amangbapurtem ajaki lendong atalokba tesem tonga motetaka pei aliba tesem nung maneni sarasadem ajanga yaritsü ayongzüker. 1. Tasüba atalokba kibongtem nung Tsüngremer tesüneptsüba lidakjang ta sarasademdi. 2. Tena tamajungba kuma maotsü asoshi Tsüngrem teyari meshidi. Sarasadem nung tashi lir.

Rev. Dr. Mar Pongener, Executive Secretary, ABAM

Mon district nung ano civilian 2 khaset; AR tesep rongdoktsü



Eastern Naga People's Organization (ENPO)-i Deobar aonung DC court junction Dimapur nung Oting, Mon nung tai maketba Naga nunger tepsetba anema lungkak aitba sentong ka agidang tangokba noksa angur. (Dimapur, December 5)

Dimapur, December 5, 2021 (TYO): Nagaland kübok Mon district nung Deobarnü Assam Rifles-i ano civilian ana khaset aser aika yirutsü ta osang angazüker.

Honibar nikongdang Oting nung tai maketba yimdaklir 13 khasetba atema tejashi nung Deobarnü nisung kari Assam Rifles tesep ka amakdang sepaitemi injang khaloktsü ta osang ajanga ashi.

Tanü lungkak aiter ana tepsetba züngsema Mon district nung Assam Rifles-i nisung 15 tepsetogo.

Külen, Honibar nikongdang iba tesem nung alirtemi tejashi nung sepaitem den raradang Assam Rifles jawan ana tepset.

December 4, 2021 nikongdang Oting nung nisung 6 Tiru nung nakmati atudak aayangi orr meyipa arudang Indian Armed Forces-i parnokki telungpurtem ta bilema aibelena khaset.

Injang ola yokba angashiba sülen yimdaklirtemi iba tesem tonga ao aser idangji sepaitemi tasüingtem alepbanger parnok indang truck ka nung miima enokya aliba angu ta osang angazüker.

Ajsüaaka, aayangertem amenba mini-truck nung azü alibaji yimdaklirtemi angu saka sepaitemi ibajia litem agi nembangtsü merang.

Iba mapangji sepai karibo

tasüingtem alepbanger aliba madak mena sayu aser parnokki nisung tepsetba miimbangtsü merang. Ajsüaaka, lanur kar arur truck gari mita repringdang tasüingtem angu aser iba sülen yimdaklir o sepaitem tsüingda raratep.

Yimdaklirtemi tejashi nung army garitem nung mi senokja rongdoktsü aser sepaitemi meyiper injang khaloktsüdang ano yimdaklir tenet khaset, ta osang ajanga ashi.

Iba tatalokba nung nisung kar samar bushitepar aser parnokki tasü mesüra taküm lir'ar mejangja lir ta angazüker.

Iba lendong atalokba sülen tensa tamajungba mekümdaktsüsü atema Mon district nung mobile data aser bulk messaging services shibangogo. "Mon district ajungalen Service

Providers ajak indang Mobile Internet/ Data Service/Bulk SMS shibanger" ta district ketdangsurtemi sangdong ka nung metetdaktsü.

Külen, Indian Army-i sangdong ka nung iba lendong atalokba atema kanga sasar ta metetdaktsüogo.

"Telungpurtem senzüba indang osang tejangja ka angazükba nung ajemdaker sepaitemi Tiru, Mon District nung mapa inyadngang nisung taküm laluba atema kanga sasa bilemer" ta PRO (Def) Kohima, Lt Col Sumit K Sharma-i sangdong ka nung ashi.

"Iba tatalokba ya tematiba jenjang nung bushisüngdangtsü aser ozüingi melaba ama merenshitsü. Iba lendong nung sepai ka asü aser aika yirua lir" ta Lt Col Sumit-isa ashi.

DNSU-i ghonda 6 atema Dimapur mokdangtsü

Dimapur, December 5, 2021 (TYO): Naga Students' Federation (NSF)-i Naga nunger aliba tesem ajak nung December 6, 2021 anepdang 6:00 ako nungi anüingdang 12:00 ako tashi mokdangtsü ayongba ama Dimapur Naga Students Union (DNSU)-i Dimapur mokdangtsü.

Ghonda 6 mokdangba nung medical, police, kiyimba sentongtem (wedding card abentsüla), tanga

emergency services aser tatidang agütsüba kaketshirtem madentsü, ta DNSU-i taonung sangdong ka nung metetdaktsü.

Mon district kübok Oting nunger tepsetba anema iba mokdang ayonger anungji Dimapur nung aliba senso ajaki tai maketba nisungtem tepsetba aitsür ta sayua iba tetuyuba sülen anidaktsü mepishir, ta DNSU-isa metetdaktsüogo.

Nagaland nung kin 8-i Hornbill Festival nung shilem magitsü Ao Senden-i Mkg rangben mokdang; Wako tanak asonger

Dimapur, December 5, 2021 (TYO): Mon district nung tai maketba nisungtem tepsetba anema Nagaland nung kin 9 tashi Kisama Heritage Village nung Hornbill Festival nung shilem magitsü osang metetdaktsüogo.

Eastern Nagaland People's Organisation (ENPO)-i par telongtet nung azütokshiba atema Hornbill Festival nung shilem magitsü lemet.

ENPO-i kin 6 dang tanü nungi shilem magitsü mepishio.

"Asen nüborrem tepsetba mapang ka nung kodaser asenoki benjung nung tsüingsangtsü" ta ENPO tanishir kati ashi.

Kisama nung Konyak, Chang, Phom, Khiamnuingan, Yimkhiung aser Sangtam arjitem ajak shibangogo.

Külen, Lotha Hoho, Sumi Hoho

asonger Ao Senden teloktemia iba tatalokba aitsüba sayua Hornbill Festival nung shilem magitsü osang metetdaktsüogo.

Ao Senden:

Mon district kübok Oting yim nung India sepaitemi tai maketba nisung 13 tepsetba atema Konyak nunger mangyimer aser asenokia parnok pusema nungiter ta sayutsü atema Kisama nung Ao Arju shibanger ta Ao Senden-i sangdong ka nung metetdaktsü.

Tanga tetuyuba ka magütsü tashi Kisama nung Hornbill festival nung Aori shilem magitsü, ta parnokki ashi.

"Maneni, December 6, 2021 anepdang 6:00 ako nungi anüingdang 12:00 ako tashi Mokokchung district ajanga nung mokdangtsü" ta Tatong Tir Wb. I Imkong Jamir aser Tongti Tezülur

Wb. Imtipokym nati sangdong ka nung ashi.

"Iba mokdang nung medical emergencies, tatidang agütsüba kaketshirtem, media aser kiyimba sentongtem madener" ta Ao Senden-isa metetdaktsü.

"India sepaitemi meimchir tangatetba melii aser tashiyim amshia mapa tamajung inyakba aitsür aser aibelenertem nem tapet temerenshi agütsüsü akhanger" ta Ao Senden-isa ashi.

"Ao Senden-i tasür kibongtem den asükuh lemsateper aser Tulusang Tsüngremi mangyimba mapang nenok sünepjang ta sarasademtsür. Nenok den külemi tejashi lemsateper ta sayua Ao Senden office nung wako tanak ka atsüketogo" ta Tatong Tir Wb. I Imkong Jamir aser Tongti Tezülur Wb. Imtipokym nati metetdaktsü.

Union Home Minister-i anir Mon tatalokba aitsür

Dimapur, December 5, 2021 (TYO): Mon district kübok Tiru tesem nung Indian army-i Honibar nikongdang tai maketba yimdaklirtem tepsetba atema Union Home Minister Amit Shah-i anir Nagaland & Assam Governor aser Chief Minister na den telok aikati sangdong balala ajanga aitsüba

osang metetdaktsüogo.

"Nagaland kübok Oting, Mon nung tesasatsü lendong atalokba atema temolung raksar. Taküm laluba kibongtem den ni mangyim lemsateper. State sorkari tentetba SIT ajanga iba tatalokba bushisüngdangtsü aser takoksa ajuruba kibongtem nem temeten

agütsüsü" ta Amit Shah-i Deobarnü Twitter nung metetdaktsü.

December 4, 2021 nikongdang Oting aser Tiru yimtem tsüingda yimdaklirtem khasetba khukhua aitsür ta Governor Prof. Jagdish Mukhi-ia sangdong ka nung ashi. (Maneni tapak 2 nung...)

Soyim Gazetted Officers' Association tenzüker küm 25 jungogo



Soyim Gazetted Officers' Association jubilee sentong takok ngua munger külen shilem agirtem külemi tangokba noksa nung angur. (Ungma, 4th December, 2021)

Ungma, Dec 5 (TYO): Soyim Gazetted Officers' Association (SGOA) tenzüker küm metsür pungu (25) ajungba silver jubilee sentong "Selfless Service" omen dak rangloker Babu Tzüpu Amphitheatre Ungma nung takok ngua mungogo.

Tongti o jembir Ungma Baptist Arogo Pastor, Rev. Dr. Noklen-i jubilee omen nung ajemdaker jembidang, pei taküm amatoker nisung ajak den tebandang makai meimtsü aser tenzüksü asoshi tayongzüka ka agütsü.

Mapa tajunggi aikati inyaker saka

aikati konang nüngsang aginüa dang inyaker, anunggi, mapa tajunggi tangar nem memettdaktsü inyaksüla, ta paisa ajungshia liasü. Tekübokba jenjang nung alirtem reprangteta yaritsüla kechiyong shitakba teyari nungdakertemji itempur lir, ta paisa shisem.

Gazetted officer-temji sorkar aser nürurtem asoshi tongshi lir, sorkar sentong ajak nenoki dang mapa küma inyaker, anunggi, nenokji temelenshi bener arurtem südaksünür aser yimertem asoshi sentong tajung yanglua tim lenmang sayutsüdaktsünür, ta paisa

ayongzüka jembir. Rev. Dr. Noklen-isa SGOA jubilee nungtem nungo kakat adoktsü aliba ka sayatsü.

Sentong nung DIG Prison Wb. Imtiangshi Longkumer, Industries & Commerce Asst. Director Wt. S. Rarenbenla Longkumer, Ungma Village Council Chairman Wb. R. Nungshilepden, taoba SGOA tir Dr. L. Temjen Jamir, Jubilee Convener Prof. Temjensosang parnoki tepela o den menungraba o aser salem osang tulu bener arua lemsatep. Telok balalai kentenmenü balala ajanga tesentepertem saksalemdaktsü.

Union Home Minister-i anir Mon...

(TAPAK 1 NUNGI...)

Sorkari iba tatalokba bushisingdang temeten agütsüsa atema SIT ka tentetogo. Ano army anema court of inquiry ka tentetogo, ta Governor-i ashi.

Nagaland Chief Minister Neiphiu Rio-ia Mon district nung atalokba aitsüogo.

"Oting, Mon nung tai maketba civilian tem tepsetba atema kanga sasar aser iba inyakyim khukhua aitsür. Tasür kibong den mangyim lemsateper aser yirua alirtem tekaraba nung taneptsü angutsü moatsür. SIT ajanga bushisingdangtsü aser ozüing nung aliba ama temeten agütsüsa.

Nisung ajaki tensa meraksatsü mepishir" ta CM Rio-i metetdaktsü. Nagaland Tribes Council (NTC)-ia tanga sangdog ka nung Indian Armed Security Forces-i Oting nung anogoshia aayanger nisung 15 tashi tepsetba osang angashia aoksar ta metetdaktsüogo.

Iba tatalokba ajanga Indian Armed Security Forces-i küm 60

tema tashi Naga nung dak tashiyim mapa inyaka aruba aser tepsetba bilemtedaktsür aser iba ama lendong ya joko matalokdaktsüsa, ta NTC-i ashi.

"AFSPA tenüing amer tai maketba nisungtem kshetba ya meimchir temeten anema lir. Anunggi NTC-i iba mapa khukhua aitsür aser sorkari High Level Enquiry ka tenteta takoksa anguba kibongtem nem temeten agütsüsa akhanger" ta NTC President Toniho Yepthomi aser General Secretary Nribemo Ngullie nati sangdong ka nung ashi.

Maneni, Nationalist Democratic Progressive Party (NDPP), Naga People's Front (NPF), Nagaland Pradesh Congress Committee (NPCC), Rising People's Party (RPP), Nagaland Indigenous People's Forum (NIPF), Dimapur Ao Youth Organization (DAYO), Forum for Naga Reconciliation (FNR) aser Khasi Students Union (KSU) teloktemi sangdong balala

nung iba tatalokba aitsüba den Armed Forces (Special Power) Act agientsü aser takoksa ajuruba kibongtem nem temeten agütsüsa takhangba balala agütsüogo.

NPCC-i tasür kibong shia nem Rs 1 Crore aser yirua alir shia nem Rs.10 lakh teyari agüjang ta takhangba agütsüogo.

Külen, RPP-i anogo 7 'state mourning' alitsü aser iba atema Hornbill festival athitsü shiogo.

RPP-isa Nagaland nung MLA 60 prongi Mon nung nisung tepsetba aija külem sangdong ka agütsüsa aser High Court/Supreme Court nung tang teinyakdak Judge ka ajanga bushisingdang asütsü takhangba agütsüogo.

Maneni, Khasi Students Union (KSU)-ia India sorkar dang AFSPA tangsa agientsü aser iba melena Northeast India nung lisopurtem temeten aser taküm kümzüka ayutsü atema ozüingtem yanglutsü takhangba agütsüogo.

Dimapur nung non-local nisung ka gari agi menüngset

Dimapur, Luchii/Dec. 05 (TYO): Railway track, Dimapur anasa Over-bridge Colony nung December 04, 2021 nü talidak ki mali meshimetsür (non-local tebur arishi küm 45 shi) ka gari (tata-mobile) agi menüngset, ta osang ka ajanga ashi.

Ozüing agi melaba maparen ajunga tembangba sülen tasüming

ya PM examination/jangjatsü atema District Hospital Dimapur Morgue nung yua lir.

Kibur/kinunger/medemer temi Officer-in-Charge East Police Station, Dimapur den Mobile number 7085055020 ajanga tongteprateptsü akok, ta osang ajanga ashi.

Mon nung tai maket nisung tepsetba atema lokti balalai aitsür

Dimapur, Luchii/Dec. 05 (TYO): Mon district kübok Oting tesem nung Indian Security Forces temi junga masadangi tapi agi tai maket civilian tem tepsetba asoshi khukhua aitsür, ta Ao Kaketshir Telongjem Dimapur ajanga sangdong ka nung ashi.

Mangyimer kibong den asükhü lemsateper aser iba lendong nung yirur alirtem tekeraba nung taneptsü agüjang ta sarasademtsür.

State sorkari iba lendong kanga junga bushisingdang tekeratiba nung tapet obendang agütsüsa, ta AKTD sangdong ajangasa ashi.

Mapang talangka majangshiba Indian security forces indang tamachi mapa shiruru molungsentü ama temai adoka December 4, 2021 nikongdang Konyak Region (Mon district) kübok Oting yimtsüing nung tai maket yimdaklir nisung 15 tepsetba ya Naga nung asoshi anogo tammang ka lir, ta GPRN/NSCN indang sangdong ka ajanga ashi.

Ajaklen anguba Indian security forces temi Naga lima nung azüdokshiba yipru tamajung bener aruba ya tang tasen ka masü saka tesüba mapang chichiba Naga political movement ajemreptsü merangba maneni amshiba ka dang lir.

Indian security forces temi koma'ar ka müreka telungpur senzüba osang itdangiter nungi angashiba den sendaktepa sangdongaka Naga nung tai marketer azü agi teka menena aliba kodanga meshidoktetsü, ta GPRN sangdong ajanga ashi.

Iba lendong ya 21st Para Commandos/Assam Rifles mapa ta angazükogo. Taoba mapanga Government of India indang Armed Forces (Special Powers) Act (AFSPA) kübok temerenshi mesüra talenba makai Indian security forces temi Naga nung reshikangshia aru.

Küm 20 dak tema Indo-Naga yimten ken o jembia aruba nung süngjang tajung atangba mapang ka nung Naga nung anema azüdokshiba manener.

1997 küm Indo-Naga ceasefire zülutepba nung ibai tia makatiba shilem ka lir.

Iba tensa nung teka tazüing civilian tem tepsetba aitsüsa atema tim o monguteter aser tejakleni renloka aoba lima (Nagalim) nung kecha yimya nunga temeden mebushitet, ta parnoki ashi.

Iba ama tasü mait yimya nung tai maket nürurtem tepsetba ya meimchir anema lir aser iba mapa tamajung inyaker nem tapet temerenshi agütsüsa.

NSCN ajanga temolung taroktiba nungi mangyimer kibong den asükhü lemateper. Kasa lendong nung kanga mejungi yirutsür alirtem den tejashi lemsateper aser tekeraba nung taneptsü agüjang ta sarasademtsür, ta kasa sangdong ajanga ashi.

Taochi mali aser bilemdangtsü makokba yimya nung Indian Security Forces kari Honibar

nikongdang Mon district kübok Oting yimtsüing nungi tai maket nisung 13 tepsetba aser ano aika yirutsüba asoshi kanga aoksar, jashir aser mang ayimer, ta National People's Party, Nagaland State ajanga sangdong ka ajanga ashi.

Tai maket aser teka tazüing yimdaklirtem ya Tiru nung mijang atoba tesem nungi pei kidangi pick-up truck ka nung meyipa shilangba mapang Indian Army temi tepset, ta osangtem ajanga ashir.

Indian Security Forces temi tai maket civilian tem tepsetba ya tatok magütsütetsü aser magütsüsa.

Iba ama taochi makaba mapa ya meimchir temeden nung aibelenba den sako lir aser ajaki aitsütsü temsüa lir. Security forces temi tashi mait aser tai marketer dak iba ama mapa tamajung inyakra aser ajaki yimjung aser terenlok yongya ataba mapang ka nung iba ama azüdokshia mapa inyakang NPP ajem ajema malitsü, ta sangdong ajanga ashi.

Anunggi Indian Armed Force nung jawan temi tai maket yimdaklir tepsetba asoshi NPP Nagaland ajanga khukhua aitsür aser sorkari tekeratiba nung aibelener nem tapet temerenshi agütsüsa akhanger, ta ashi.

Sorkari aibelener nem tekeratiba nung tapet aser tesashitiba temerenshi agütsüsa ajungshir, anunggi dang tarutsü nung iba ama mapa meinyaktsü.

Armed Forces Special Powers Acts (AFSPA) ozüing kübok Indian Armed Forces temi timtem peria agütsüogo ta Government of India aser Naga nung ajanga dang nenshia ashir, koba agi terenlok bener arutsü melena tai maketba takum ang timba lalüogo, ta NPP Nagaland ajanga ashi.

Anunggi region nungi iba act ya tekeratiba nung agientsü akhanger. Pei nürurtem dak iba ama ozüing tesashi agi alena timtem jendi agütsüdog India ya democratic republic linük ka ta meshitet.

Tawa Manipur nung linük asoshi takum tenlaba Naga nung jabaso Asür Khatnei Konyak melena Nagaland nung aliba nürurtem yamai amshir asü ta Army nung tanishir aser Central sorkar dang asüingdangner, ta NPP Nagaland ajanga ashi.

Pa ya Mon district nungi liasü. Yangia kechiba Asür Khatnei Konyak'er kibong nem teyari shidak magütsü ta state sorkar dang asüingdang, kechiaser Assam nungi kasa jawan ka Asür Khatnei den külemi tepsetba atemabo konang tetushi aika den teyari sen lakh 50 agütsü.

NPP Nagaland ajanga asür nem akum agütsür aser mangyimer kibong aser kinunger den asükhü lemsateper.

Asen adianu tanüla tesunep nung anisüngzükjangma. Central aser State sorkari tekeratiba nung asür aser yirur alir nem teyari shidak agütsüsa ajungshir. Yirur alirtem asoshi tekeratiba nung taneptsü agüjang ta sarasademtsür, ta NPP Nagaland sangdong ajangasa ashi.





**CHIEF MINISTER
NAGALAND
KOHIMA**

24th November, 2021

MESSAGE

- I am happy to know that the home guards, Civil Defence & state disaster response force organisation is observing its Raising day on the 6th of December, 2021, all over the country.
- This organisation has been doing yeomen's service to the nation for the past many years since its raising. In times of emergencies, caused by accidents and natural disasters, the organisation never fails to respond to the needs of the situation; rendering timely and invaluable help to those in need and in distress. During normal times, they conduct disaster response awareness campaigns, and educate the people on how to respond and react in times of emergencies. They also help the state police force in many other ways, including traffic control in cities. I appreciate the good works rendered by the organisation.
- I extend my warm greetings to the organisation on the occasion of their raising day, and also send my best wishes to the officers, rank and file of the organisation in their noble mission to help humanity.



24/11
(NEIPHIU RIO)

Manipur nung Loktak Lake renlokdaktsütsü: Sarbananda Sonowal



Sarbananda Sonowal

Imphal, December 5, 2021 (Agencies): Union minister of ports, shipping and waterways, Sarbananda Sonowal-i Manipur kübok Loktak Lake nung Inland Waterways of India (IWAI) Jetty semdanga liasü.

Iba mapang Sonowal-i rong ka nung mener Loktak Lake ma nung senzü.

"Loktak Lake ya Asia nung awatsüing tulutiba rongnung ka lir. Loktak Lake ya tobur tajung aser ango aika lir" ta Sonowal-i ashi.

"Asenoki iba awatsüing ajungkettsüla aser renlokttsüla. Iba ya alima nung tourist temi semdangba tesem tongti ka kümdaktsütsü merangtsüla" ta paisa metetdaktsü.

"Onoki inland waterway development aser Ayush wadang asoshi Manipur sorkar

nem akokba tashi teyari agütsütsü" ta Sonowal-isa ashi.

"Onoki Loktak lake ajungkettsüaser renlokttsü atema akokba tashi teyari agütsütsü. India sorkari 100% yaritsü" ta paisa shisem.

"Terenlok mapa inyakttsü sentong lira onok dang shiang, onoki yaritsü. Loktak ya Manipur atema dang masü saka Northeast aser India atema tobur tajung tesem ka lir. Asenoki Loktak ya Manipur tanüla ta züngshidi" ta Union Minister Sonowal-isa metetdaktsü.

Prof. Jagdish Mukhi
Governor of Nagaland



RAJ BHAVAN
Kohima - 797001

November 18, 2021

MESSAGE

It is a joy for me to congratulate Home Guards, Civil Defence & State Disaster Response Force Organization on the glorious occasion of its Raising Day on the 6th of December.

As the Organisation celebrates this significant occasion, I salute the strong and brave personnel for their selfless services to the people. The Organisation has been in the forefront during numerous calamities and provided rescue and relief to the people in times of need. They are also fundamental in our internal security. I express heartfelt gratitude to the personnel for the altruistic contributions during the COVID-19 pandemic.

I believe the Organization with experience will grow further and deliver even more than the expectation of the people.

On this auspicious occasion, I wish all the personnel of the Nagaland Home Guard, Civil Defence & State Disaster Response Force a joyous celebration.


(PROF JAGDISH MUKHI)

NOKE WANGNAO
MLA & ADVISOR

Department of Social Welfare,
Home Guards & Civil Defence
GOVERNMENT OF NAGALAND



R/No.CMS-10
New Secretariat Complex
Kohima-Nagaland
Pin-797001
Mob-9436000193

Raising Day Message to be delivered on 6th of December 2021

I extend my warm felicitation to all the members of the Home Guards, Civil Defence & SDRF families on this auspicious raising day observe on the 6th of December every year. Indeed, it is my privilege to be associated with this organization for the last few years and for being part of this family.

As we understood, the Home Guards, Civil Defence and SDRF was initially raised and considered as subsidiary to the state police force. But over the years, the role and responsibility of the Home Guards, Civil Defence & SDRF have widened in term of responsibilities, activities and services. Today, the organization has become indispensable not only in assisting the state police force in maintaining internal law and order, but in meeting the different emergency situations in the nature of pandemics and natural disasters. In recent times, the fearless and selfless services rendered and sacrifices made by the personnel in response to call of duty during natural disasters and in pandemics are commendable.

The foremost priority of government is to protect and secure life of its citizens and to create the condition of peace and tranquillity in the state. The Home Guards, Civil Defence & SDRF has been contributing immensely towards these objectives since inception. And with the substantial growth and development of the organization in various aspects, the responsibility of the organization is expected to increase further in days to come.

It is my take therefore, that this important raising day should be celebrated in a befitting manner, highlighting the roles of the organization and adequately publicising the praise worthy activities of the organization.

I congratulate all the members of the Home Guards, Civil Defence & SDRF families for the achievements so far and wish you all the very best for future endeavours.

Thank you and God Bless.

(NOKE)

Tezpur University nung drug counselling centre lapok



Tezpur University-i drug counselling centre ka lapokdang tanokba noksa nung angur.

Guwahati, December 05, 2021 (Agencies): Nüburtem dang temesepba mozü amshiba indang tekümdangtsü sangoktsütsü aser yi ajemba den temesepba mozü achiba ajanga temang nung timtem agütsüba metetdaktsütsü aser counseling services agütsütsü nükjidong nung Tezpur University-i drug counselling centre ka lapokgo.

"Nasha Mukta Bharat Abhiyaan: A Step to Build Abstemious Society Through Community Intervention and Promoting Healthy Habits" mapatong nung shilem ka ama University indang Social Work Department-i Counselling Centre for Preventing Unhealthy Behaviour (CC-PUB) ta nüngja agütsür iba Centre lapokja liasü.

Hokolbarnü, iba University indang Department of Social Work, tekolak Dr. Chandan Kumar Sharma-i iba Centre lapokja liasü.

Dr. Sharma-i, iba Centre indang metetdaktsü aser counselling agütsü nüngdakbapurtem iba Centre yagi arua ajangzüksü imlar ashi.

Iba dak sendakba nung awareness drive ka agütsü kanga tongtibang, ta paisa ashi.

'Nasha Mukta Bharat Abhiyaan' mesüra 'Drugs-Free India Campaign' ya August 15, 2020 nü India kübok District 272 nung tenzükja liasü. Ministry of

Social Justice and Empowerment ajanga agütsüba osang balala nungi data bendena kanga dang lendongbang (temesepba mozü amshirtem) aketba tesem nung iba Campaign tenzüksü.

Iba campaign ajanga temesepba mozü amshiba nokdangtsü, nübur dang tekümdangtsü osang sangoktsütsü aser tesayuba agütsütsü, service provider nem training agütsütsü, shisaliok rejutem den tesendaktep yanglutsü aser treatment, rehabilitation den counselling facility maparen ulushitsütsü nükjidong yur inyakttsü.

"Ministry of Social Justice and Empowerment indang 'Drugs-Free India Campaign' mapatong tejakleni bener aotsü asoshi, Principal Investigator Dr. Apurba Saha, Assistant Professor of Department of Social Work akhüm nung Department of Social Work, Tezpur University-i "Nasha Mukta Bharat Abhiyaan: A Step to Build Abstemious Society Through Community Intervention and Promoting Healthy Habits" ta nüngja agütsüba project ka tenzük," ta pai ashi.

National Action Plan for Drug Demand Reduction (NAPDDR) den iba Project indang tanga maparen shilem ama, iba drug counseling centre amenoker," ta pai shisem.

Mizoram nung nisung 282 dak COVID putet

Aizawl, December 05, 2021 (Agencies): Deobarnü Mizoram nung nisung 282 dak COVID-19 tashidak tasen putet.

Iba ya Honibarnü puteter dang nungi nisung 33 agi tajemba asütsü aser State nung Covid-19 puteter nisung 1,36,362 kümogo, ta health department ketdangtsür kati ashi.

Tesüiba ghonda 24 nung iba tashidak ajanga nisung ka süogo. Tasüsang ya Mamit district nungi arishi küm 56 tain ka ta jangjaogo aser State nung Covid-19 agi asür nisung 505 kümogo.

Tashidak tasen (282) puteter rongnung, Aizawl district nungi timba (149) putet. Iba sülen Khawzawl district (30) aser Lunglei district (28) asütsü, ta pai ashi.

Single-day positivity rate

shilem 12.63% nungi 10.66 % aluogo aser sample 2,646 nungi tashidak tasen ya putetta liasü, ta ketdangtsüri ashi.

Tang Mizoram nung nisung 3,555 shi COVID-19 agi shirangdar. Honibarnü nisung 346 shi iba tashidak nungi taneptsü nguogo, kong State nung taneptsü angur ajak sentepa nisung 1,32,302 shi asütsü.

State nung Covid-19 nungi taneptsü angur shilem 97% aser tasüba shilem 0.37% asütsü.

Mizoram nung iba wara adoker külen nungi COVID-19 atema sample lakh 14.44 shi tendangogo aser Honibarnü sample 2,646 shi tendanga liasü.

Honibar tashi nisung lakh 7.22 nem Covid-19 vaccine agiogo aser nisung lakh 5.66 dak temai dose anaprongla agiogo, ta State immunisation officer Dr Lalzawmi-i ashi.



TIR YIMYIM YIMOBILEM (EDITORIAL)

DIMAPUR TENTONÜ, LUCHII(DECEMBER) 06, 2021

Naga nunger longjemtsü akanger

Mon district kübok Indian sepaitemi Oting nunger tai kecha maketba nisungtem ayangdak nungi amongnü kinungertem den külemi amongtsü yim bushia aruba mapang, yakanü Küptok nü (Honibar) nikongdang ajungbena ka injang yoka parnok terpungo tashi kasetem miimbanga ayutsüba merangba mapaji, alima nung nisungi nisung anema inyakba mapa tamajungtibaji aji asütsü. Parnok ya yimtaklir, kibong mesütsü atema ayangi aoba, kecha tai maliba Naga nunger, iba yimobilem zülü tashi nung teyirurtemji yutsür parnok nisung 15 tasü mang nguteter liasü. Ibaibo tebang agi ashitsü makokba Indian sepaitemi nisung miimchir taküm mapayui inyakba mapa tamajung ka asütsü. Tang Oting nung atalokba lendong yagi küm 70 shi jakdang asen tsüraburtem mapang India sepaitemi Naga nunger kiojen aser alu rongdoksür külenang, yim asem pezü anidena yimtsüng ka nung mongdaksüli ta reshikangshiba anogotem bilemtetdaksür. Asen tsüraburtem asoshi India nunger sepaitem ya bendanger kiralongrartem amai liasü. Item kiralongrartem ket nung asenok tsüraburtem taküm aika samaogo aser aika kanga mejungi lematar timtema iba akümüli nungi pilaogo. Iba ama putu ka nung aienba Naga nungertem asoshi India sepaitem parnok sepai süoshi semer angubaji tetsübuttsüka liasü, kechiyong parnok tenük agi India sepaitemi parnok tsüraburtem tetsübuttsüka reshikangshiba angu aser yangji tsübuok. Iba tetsübuokba tetsübu shisatsüji tang tashi Naga nunger taintem aika mulungjang nung lir. Iba amaji kodanga tai medoktettsüsa aser mamatettsüsa India sepaitem ket nung Naga nungertem reshikangshi aser mezüngmeshiba mapatem aika liaka, alima nung ajak den yimjung nung linüba agi aser tarutsü lanu putubo tesünep aser tepela nung lidaktsünüyong, Naga nungertemi India sepaitem nem taidok agütsü aser yimjung yanglu. Ajisüaka, ano tanüa kasa tsüraburtem dak inyakba taochi makaba shisatsü agi India sepaitemi tai maketba Naga nunger kasetbaji taoksatsü, tejashitsü aser temulung ashitsüka lir. Tamasayongi Naga nungertemi India kübok India nunger kümer melinü saka India nungertemi kangshia asenok Naga nungertem India nunger kümdaktsü aser asenok anüktsü atema India sepaitem asen limai yok. Ajisüaka, asenok taküm kümzüka anüktsü purtemiang asenok tai maketba nübertem kasetem süra, parnokji asen lima nung maliang tajungba. Küm 100 shi jakdang, asenok tsürabur lenirtemi British nungertem dang, "kodang nenok India toktsür odir, onok India kübok masü onok kija balaka tokjang," ta ashiba kasa tangatetba shisatsü to tanü lua arua bilemdangtsü kanga nungdaka kümogo. Yakanü Oting nung tai maketba yimtaklirtem kasetertemjibo parnok mapa dak alang temerenshi angutsü imlar, saka asenoki kodang asenok Naga nunger melongjemtetba tensa tia indang ya bilemdangdir, külen India sepaitemi kecha tapayu melii tai maketba takümtem samatsür aser külen asenok rongnung telok teimba teimba küma lemsar, tanü aser asüng Naga nunger asoshi külemi longjemer telemtetba tajung ka magitetter. Oting nungerji Konyak nunger aser Konyak nungerji Naga nunger, anungji Oting nunger tai maketba senso tajung paikaji kenüyongi kasetbaji asenok Naga nunger ajak asoshi kanga takoksa. Iba takoksaji kecha agia memenoktettsü. Iba tensa tia yagi Naga nunger kin ajak ka küma longjemtsü akanger. Akhidanga, India sepaitemi Naga nunger ajemreptsütsü atema Naga nunger tsüngdang Naga nunger kasete sayua tsübuokdaksü. Iba kasa tasa jagi tanüa Naga nunger tsübuokdaksütsü atonger. India sepaitemi inyakba mapa tamajung anema ya Naga kin ka kijaibo menokdaktettsü, Naga kin anaasem longjemba agia makoktsü, anungji Naga nunger kintem ajak longjemtsüla. Atangji, tanü tashi Naga nunger melongjemtettsüsa shisatsü apuoktsüba yaa, tangari masü, India sepaitem kolok nungi adoka inyakba mapa ka lir. Asenok joko parnok ket nung ojang amshidaktsüdi, ojang mezüngmeshidaktsüdi aser ojang amokmerendaktsüdi. Tang ama India sepaitem o Naga nunger yimten nüchiso bushirtem na tsüngda yimjung lapoka aliba mapang ka, India sepaitemi tai maket yimtaklirtem 15 tashi kasetba mapaji "Cease Fire" nükjidong asü? Ya angatettsü tasak. Joko, asenok Naga nunger rongnung anüdok anülü alir ajak ka küma longjemdi aser India sepaitemi asenok tsüngda kati ka dak temulung melemtettsüsa shisatsü tamajung apuoktsütsüsa lenmang melapoktsüli. Asenok longjemdi aser Naga nunger tai maketba nisungtem kasetertem nem tapet temerenshi magütsü tashi kenbang obang aser temulungjang ka ser inyakdi. Tensai Naga nunger ka küma longjemtsü akanger. Iba jagiang Naga yimten tebilemttsüa tatem küma latetttetsü.

OLEMSABANG

Arogo züngsem nung shibasa enoktsü?

- Imliodang Aier

(Yashi adok nungi...)

3.2. Laishibaji dang tematiba tashi (sole authority of the Bible) nung arogo aika nokdaka mali ama angur. Laishibaibo temenen kecha mashishi ajak agizüktsüba sayu sünnung iba tashiji shitak mamshiteter, kechiyong sobaliba ozüngi yamaji inyaktsü memelar. Kidong lembuba ya arogoi tatok magütsütettsüsa (arogo nung züngsem magizüktsüsa) Laishiba koba kuli agi medentsür? Süra arogoi tanü Laishibaji arogo yimden nung sobaliba ozüng yarisemba tashi (supplementary authority) ka mesüka kümdaktsü masü no? Koma süla?

3.3. Akhi ama dang linüba (stagnancies) tangatetba lir ama ajiteter. Sobalibaji Khrista yimsü marudang nungi liasü anungji ya ajakbo Laishiba den mapeter. Akhi tsürabur mapang arogo leniba par tendak par shisa tongtet nung yanglu (kulitem asenoki mejangja), saka lia arudang tensa den apet aika meleshi arudagi. Tanü tangatetba karaa ainba tensa nung alima den peta Laishibai mulungba medemdanga melenshia inyaktsü jangrar ajema lir. Parnoki kechi latettsüogo yang nungi marakzüli ta asür? Yagi tatem tongtetdima?

3.4. Laishiba o zülua aliba ama shitak (literal) dang agizüker. Laishibaji asenok tendak (context) nung peta ratettsü kanga tongtipang aji masünungbo tamangertem aika mashileni anitsü ana nung lir.

3.5. Tamajunger merenshiba (disciplinary action) ozüngji arogo nung akatsü nungdak, saka noklang nung 10% i ashibaji ozüngji tera atsü anem kaa taochi sayua yanglushi nung ajungtsü. Kidong lembur kodanga magizüktsü ta masü saka tanga aibelen dang nungi tera talangba arogo nungi indoka atatsü ta asüba ama arogotemi yanglushi nung tajungba asütsü.

Item tangatetbatem ya memelenshi tashibo arogoi Laishibai mulungba arogo mekümtettsü.

4. Mesüktepba temenentem (similar sins - for comparison)

Aor sobaliba nung aibelenba agi lokti nungi aser arogo nungi jentokba aikadang lir saka medemdangtsü asoshi yangi tatishitsü ana bener arua repringdang.

4.1. Kijung arakba - Aor sobaliba nung kijung arakba ya tai tulu rongnung ka lir/liasü. Kijung arakerbo yimtsüng yimteni temerenshitsü tim merenshir arogo nungi atsüngtsü. Kar yimdak dang ali karbo town balala nung oa kibong kümteta junga lia otepba angur. Tanü kijung raka kibong kümer alir aika yimtsüng, town balala nung lir, aser parnokjibo arogo nung kecha marendaki dang agizüka amshir.

4.2. Aou met achiba -Aor sobaliba nung tekalen majunger yimdeni aou met chia joko item nisung arogo aser lokti balala nung mamshii lia aru. Iba ya-a Aor sobaliba nung aibelen tulu rongnung ka lir/liasü. Item nisungtem ya-a kasa sobaliba nung aibelenba sünnung kecha mashishii arogo nung agizüka amshir. Tanü sokar maparen, lokti maparen balala nung ochimashi inyakbatembo kenyongi mashishir.

Sobalibabo sobaliba nung dang aibelenba sünnung Ao Baptist Arogoi aibelener bensaa (discriminate) amshir masü no ya? Telok kabo kheni jentoka (out-caste) amshir masü no? Bilemdangtsü lir asümüli? Item temenentem ajak ya kasa talenba kübok amshitsü ajungmesor masü saka medemdangtsü atema lemsateper dang. Arogoibo temenen mebendangi dang agizüktsüla. Arogojibo Laishibasa tamendakdak asütsüla.

5. Lai tanü dangba (Mirroring Bible)

Arogoi tebendenba ongko ashi teindokba ongko inyakba lokti ka masü ta tamasa angatetdi. Meimchiri ozüng shidak meytet nung ozüngi parnok meküzmütet, ozüngji parnok atema atakatem dang aküm anungji taochikisüng agi Tsüngremi meimchir kümzüka (Ibri. 10:1-4, Gal. 3:13, Ef. 2:8-9). Süra tanü arogotemi Tsüngremer taochi tekümzüka tashiji kong yutsür sobaliba ozüngjiang arogo nung leniba tashiji kümdaktsür? Mathi 18:12-14 nung sannükbai san tukur tuku kümzüka aliba yutsür ka len aizüka aoba asoshi temulung agüja bushiba to tanü Ao arogotemi meinyakteter asü ta sasaa bilemer. Yisui kü santem nükang, kü santem mesüang ta ashiba to kong lir. Kidong raksar alirtem tanelaji shiba nem doktsür? Arogo nung magizüki item tanelaji arogoi mesütetdima? Yisu Khrista alima nung alidang par sobaliba kübok lokti nung jentokba pur agizükba kuli aika angur. Alimelen sarur Levi (Lk. 5:27-32), nüktpangtatsür Farasi Simoner kidang (Lk. 7:36-50), nüktpangta tsürla ozüngibo lung agi onseta südaktsütsü mela saka Yisui la maittsü (Yohan 8) ano aika lir. Par tendak lokti sobaliba ozüngi jentokba pur item nisung Yisui kecha mashishi agizük aser tatok agütsü. Süra Khristar arogoi Yisu jilo majizükteter no? Kechiba temenen bendangsaa agizüktsü mulunger?

Otem

Laishiba nung tatok magütsütetba temenen (unpardonable sin) ka dang lir aser aji Tanela Temeshi anema tai menaba (Mathi 12: 31-32, Mark 3:28-29). Iba dak alaka Yisu kangki nung temenen ajak shitoktsü/shitoktsütsü. Ao Baptist Arogotemi tatok magütsütetba temenen ka bendenloka lir aser aji kidong lembuba. Arogoya sobaliba asü Laishiba nem anidaktsütsü? Arogojibo tebendenba ongko inyaker asütsüla. Arogoi sama aliba tanela bushia anepalubatamanger lokti ka asütsüla. Aji mesüra melungi Ao Baptist Arogotem tashi maitba aser tajemba küma aotsü tsübuseta bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

GFA World-i 'Moo-ving' Christmas Campaign tenzükogo



GFA World tenetsang, Dr. K. P. Yohannan-i 2016 kum India Ato kilonser, Narendra Modi ajuruba mapang tangokba noksa nung angur. Kasa noksa nung Rajya Sabha Deputy Chairman, Prof. PJ Kurien-a angur. Iba mapang nungji Dr. Yohannan-i Ganga cleanliness campaign atema sen crore 1 tenla agüja liasü.

December 05, 2021: K.P. Yohannan-i tentetba GFA World (Gospel for Asia)-i charity mapa jenti inyaker; coronavirus wara agi mejungi kongshiba sülen Khristmas mapang kanga sensakertem yaritsü nükjidong nung GFA-i "moo-ving" Christmas ta ser campaign ka tenzükogo.

Iba campaign kübok parnoki kanga sensaker kibongtem nem nashi aser an densema kiset shiruru balala tenla agütsütsü.

Texas nung amenoka aliba agency GFA World (www.gfa.org)-i ashiba agi, kiset shiruru ka agütsüba ajanga sensak tia nung alir kibong ka sensak tia melenshitsüsa lir.

GFA World-i ashiba agi, tang alima nung nütsüng million 711 bo anogo ka nung dollar sen 1.90 mesüra iba dang tajemba agi dang taküm alir, aser ibaji coronavirus wara tenzükba sülen shilem 8.5 agi timba akümba lir.

"Wara agi tamajungtiba kongshirtemji sensakertem rongnunga kanga sensakputem lir," ta GFA World tentetsang, K.P. Yohannan-i metetdaksü.

GFA indang report ka 'A

Surprising Antidote to World Poverty: Farm Animals' (<http://www.gfa.org/press/animals>) nung America nungeri taruba Khristmas mapang alima nung kanga sensakertem taküm nung temelenshi bener arutsütsü koka lir, aser iba atemaji America nungeri nashi, napong, san, ak mesüra an tenlatsüla, ta shia lir.

Yaküm Khristmas nunga GFA World pusemertemi nungdakba kibong 260,000 nem sempet balala agütsütsü atema tenla agüja liasü.

Taruba Khristmas nung kiset shiruru mesüra Khristmas sempet agütsünertemi GFA World indang online Christmas gift catalog- www.gfa.org/gift den metetpelatsü akok. Yohannan-i, "Kibong ka nem kiset shiruru tenla agütsüba ajanga sensak tia nungi adoktetsü, aser ibaji tanga kecha masü saka Tsüngrem temeim lemsatepba lir," ta metetdaksü.

Yohannan-isa, kanga sensak tia ajangshibaji taremzüktetla masü, aser ibaji ajanga sensakertemi taküm alitsü atema jana nung teshinem menema chiyungtsü bushitsüsa akümer, tanurtem mapa tasak

inyakdaksütsüsa akümer, aser tetsürtemi pei mang ayoktsüsa akümer, ta ashi.

Kiset shiruru agütsüba ajanga kibong nung chiyungtsü anguba dang masü saka kiset shiruru arener, koba ajanga sensaker kibongtem chiyungtsü anguba dang masü saka mozü alitsü aser tanurtem school-a züngdaksütetsüsa tia melenshitsür, ta pai ashi.

"Tsüngrem temeim mapa agi sayua Khristmas mapang sempet agütsüba ajanga sensaker kibongtem nung temelenshi bener arutsür," ta pai metetdaksü.

Gospel for Asia - tangbo GFA World ta ajar. Iba telok ya Khristan yimsü nung ajemdaker tentetba global mission agency ka lir. Parnoki linük tenzükertem yarir aser nisung million aika nem tanela tsütsü teimla agütsüba den Tsüngrem temeim lemsateper.

GFA World-i yaküm yim 1,200 dak tema nung angati medical camps ayongzüka katsüogo, tzübo 4,800 tutsüogo, tzü filter 12,000 dak tema agütsüogo aser tenla bendena Khristmas mapang sensaker kibong 260,000 nem sempet balala agüja liasü.

N. Ireland Arogotemi wara mapang Khristmas amongtsü renemer

December 05, 2021: Northern Ireland nung tongti Arogotemi taküm agi kum anabuba coronavirus wara lia Khristmas amongtsü atema renema wara dak sendakba ozüng tesashiba benokogo, ta osang ka ajanga metetdaksü.

Tawa coronavirus Omicron variant putetba sülen Methodist Arogoi pastor tem dang kanga shisa kaa Khristmas tekülem sentongtem ayongzüka agitsü metetdaksü aser Presbyterian Arogoia nisung

ajaki mask agitsü ozüng tesashiba benokogo; tetezü tang nungibo tekülem sentong agiba mapang tepiyong mask magizüktsü.

Taküm Northern Ireland nung tanaben Tenla kitem lapoka tekülem sentong agi tenzükba sülen Arogotemi coronavirus dak sendakba tetuyubatem benshir. Tang tashi nungbo Tenla ki telungi atudangang mesüra ken atandang mesüra senshidang ang mask inoker, saka tang nungbbo tekülem sentong agiba piyong mask agitsü.

Ajisüaka ano Arogo aikati tang tashi online ajangadang tekülem sentong agidar.

November 26 nü Presbyterian Arogoi pastor tem dang Tenla kidang arrshi kum 13 ser temapurtem ajaki tekülem sentong agiba piyong mask agidaksütsü metetdakja liasü.

Yamaji asüpila sentong aser kiyimba sentongtem nunga kiyimla aser kiyimsang na dak alaka nisung ajaki mask agitsü aser nisung tsüngda tetsüngda ayutsüla, ta Arogoi metetdaksü.

ANO GO ABEN TSÜNGREM DEN

Temeshiba asoshi ne sasa angazükang

Saka memeshi aser tantsür tar nunger otsü tagi. Aser ne sasa temeshiba asoshi meranga inyakang. 1 Timoti 4:7

Laishiba ajunganung Tsüngremi asenok dang meinyaktsü indang dang ashir masü saka paidoktsü indanga ashir. Pauli Timothy Yisu Khrista tenzükertem tajung ka akümtsü, tamang O agi maneni mesütsü ashi. Ano kechi meinyaktsüla iba indanga ashi. Tar nunger otsü nungi pilaa alitsü indang ashi. Alima otsü nungi talangka pilaa liang. Alima otsüji temeshiba den meputep. Tiyazü tesayurtemi nisung shisatsü aser tiyazü tesayuba bener arur koba agi shirnoki iba atema mita alir, parnok dak tanelaren lendong adokdaksür. Pauli aji paidokang ta ashi. Temeshiba akümtsü asoshi ne sasa azüokang.

Tsüngrem mulungsentsü teindangji temeshiba lir. Temulung asüba den iba temeshibaii tajangzükulu agütsür (1 Timothy 6:6). Ibai tamanger ajaki aginür. Saisapongeri tazüokba Oji amshir. Tasemtepba nung takok angutsü asoshi saisapongertemi iba tazüokba parnok sasa alir. Ibai metetta telemtetba agiba lir. Tanü asenok asoshi Khristan taküm ajaba tasemtepba nung takok ngunüra asenoki tejangja telemtetba agitsüla. Asenoki asen kolok aser temang Tsüngremi amshitsüsa azüoktsüla aser angazüktsüla.

Asenoki ya koda inyaktsü? Asenoki mokrema Tsüngrem den mapang agitsüla, Khrista asoshi sarasadem nokinketer ka akümtsüla, Tsüngrem O nung mapang indokba ajanga, azüngba, shisadangba, bushiba aser temulung agi angazükba ajanga asenoki ya inyaktet. Tanü iba Telemtetbaji agiang aser anogo shia aji amshiang.

Kü Kibur, Khristan ka ama mapa lidaktsüner ta ni metet aser tanü ni Na anasa kümdanga jajadakang. Amen.

Sepaitemi Mon district nung civilians tepsetbaji sashia aitsür: NBCC

Kohima, Luchii/December 05 (TYO): December 04, 2021 nikongdang Mon district kübok Oting yimdak Indian army temi civilian aika tepsetbaji Nagaland Baptist Church Council (NBCC)-i kanga sashia aitsür, ta Amongnü NBCC President, Rev. Dr. Atsi Dolie aser General Secretary, Rev. Dr. Zelhoh Keyho nati sangdong ka ajanga metetdaksü.

"Messiah, Yimjung Chuba alimai aruba benjung atongtsü mapang ana nung lia army temi ozüng alema aibelen tulu inyakba osang angashia NBCC-i aoksar," ta sangdong nung shia lir.

"Army temi ambangyima inyakba ajanga temeshi benjung mongpu anema inyakba dang masü saka nüburttem melungjang nung tetsübu aitaidsüogo. State nung nüburttemi yimjung atema yongyaba mapang ajangasa lemsatep.

jashidaksütsü aser tensa raksadaksütsü atema tendanga tai maket nisungtem mamshitsüla. Meimchirtem anema yamai inyakba kuliji India sorkari agitsüla aser aibelenertem tangasa aputsüla ta Council-i takhangba agütsür," ta NBCC-isa metetdaksü.

"Mangyimer kibongtem aser Mon district nung alirtem den mangyim jashi lemsatepba den külemi Council-i Nagaland nung NBCC nung züngsem Arogotem dang Mongolbarnü-December 7 anepdang 6:00 ako nung mangyimer kibongtem aser yimjung atema sarasadem ayongzüka agitsü mepishir," ta NBCC-i metetdaksü.

"Council-i mangyimer kibongtem den mangyim jashi lemsateper aser Tsüngremi den masü saka nüburttem parnok nem tesünep den tashi agüjang ta sarasademtsür," ta Nagaland Baptist Church Council (NBCC) sangdong mapang ajangasa lemsatep.

OLONG PAITEP # 6018

1			2					3		
4								5		
						6				
				7						8
		9								
11										
13										

TIPLÉN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 6017 TELANGZÜBA

TIPLÉN :		LANGTSÜNGLEN :	
1. Yimlibilem, 4. Anak, 5. Tangar,		1. Yongya, 2. Moko, 3. Marok,	
7. Aya, 8. Arong, 11. Par,		5. Teronem, 6. Nung, 8. Amajok,	
13. Lemjem, 14. Oagi, 15. Mulung.		9. Jangzü, 10. belem, 12. Rong.	



ALOKBA HOSPITALI AOKA ANGASHIR SOPANGBA PAR KIDANGI ODANGER :

- Sopangba** : Warakla nebuba hospitali ao-a ta na?
- Warakla** : Hauja pa tanepji Tir Yimyim paper tu azüngerba idakto tesayur merijang ter talila lir ta züngerbo aoksar süchia oadokati, aji agi tanuri yakta dang hospitali anir ogo.
- Sopangba** : Nabo kechiba hospital jaki mao?
- Warakla** : Onok watsülar 33% atema meeting lirja ya!
Sopangba Hospitali aor :
- Sopangba** : Are-e Alok na kechi agi shiranger ya?
- Alok** : Aya, ya-ya, ni anasa taro, Covid -19 putetogo.
- Sopangba** : Wa-a Alok sayangtetogo!!
Lilir : Asangla, Mangimen

TANÜBO NAI LANGZÜANG

Q. Koba State indang Golden Jubilee benjongmung atema Brand Ambassador ama Bollywood actor Sanjay Dutt shima lir?
 [A] Sikkim [B] Arunachal Pradesh
 [C] Assam [D] Gujarat
 (Taruba adok nung onoki langzüsü)
YASHI ADOK TELANGZÜBA : Dinyar Patel

AO OSHI ANGAZÜKDAK:

TANÜ ANGAZÜKTSÜBA OJANG



Lili
 (adv) temenünütsü o, mazüoktet o tali jembia senzü (joke, gossip)
 * Loktiliba nung talitapong **liliba** yimya endoktsüla.

Lim
 (n) ali, alinük (land)
 * Yim anasa among nung ozü **lim** tuluka lir.

NAI-A YA METETTER MA

INDIA NUNG NÜBURTEMI SAPUA ALIBA GARI KAR: NOVEMBER 2021'

Rank	OEM	Bodystyle	Model	Nov'21
1	Maruti Suzuki	Hatchback	Wagon R	16,853
2	Maruti Suzuki	Hatchback	Swift	14,568
3	Maruti Suzuki	Hatchback	Alto	13,812
4	Maruti Suzuki	SUV	Vitara Brezza	10,760
5	Hyundai	SUV	Creta	10,300
6	Maruti Suzuki	Hatchback	Baleno	9,931
7	Tata	SUV	NEXON	9,831
8	Maruti Suzuki	Van	Eeco	9,571
9	Kia	SUV	SELTOS	8,859
10	Maruti Suzuki	MUV	Ertiga	8,752
11	Maruti Suzuki	Sedan	DZIRE	8,196
12	Hyundai	SUV	Venue	7,932
13	Toyota	MUV	Innova Crysta	6,300
14	Tata	SUV	PUNCH	6,110
15	Maruti Suzuki	Hatchback	CELERIO	5,968
16	Hyundai	Hatchback	i10 Grand	5,466
17	Mahindra	MUV	Bolero	5,442
18	Tata	Hatchback	Tiago	4,998
19	Kia	SUV	SONET	4,719
20	Hyundai	Hatchback	i20 Elite	4,391
21	Mahindra	SUV	XUV300	4,005
22	Maruti Suzuki	Hatchback	S Presso	3,661
23	Mahindra	SUV	Scorpio	3,370
24	Maruti Suzuki	MUV	XL6	3,280
25	Mahindra	SUV	XUV700	3,207

SUDOKU # 6059

TELANGZUBA # 6058

				6	7			3	1	7	6	2	4	8	5	9	
1	2			8			4	5	2	4	6	5	8	9	7	3	1
4	7			3				9	5	9	8	7	3	1	2	4	6
7	8	9	1	2	3				9	2	5	4	1	7	3	6	8
3		2		6	5	1	9	7	8	7	4	3	6	2	9	1	5
		1		9	4	8	3	2	1	6	3	9	5	8	4	7	2
5						9	7		6	5	9	8	4	3	1	2	7
	1	7			8	4			7	3	2	1	9	6	5	8	4
		8		7		3			4	8	1	2	7	5	6	9	3

OJANG LUTEP # 5605

- JUNTAG :
- TSINYAKÜ :
- OSHASI :
- ANMAPG :
- TEMJTEEN :
- AIMAT :
- NGTA :
- NGYOI :
- YAINK :
- ZÜKTENANG :

OJANG LUTEP TELANGZÜBA # 5604

TSÜNGREM DANG ASÜNGDANGA ASEN SENTONGTEM
 YANGLURA ITEM SENTONG TAKOK ANGÜTSÜ

TAN HOPTA ATEMA - KOMA SÜLA ?

Q. Kisüjensü dang agiba osettem aser asen taküm atema nüngdakba chiyongtsü aser osettem ajak asenoki asen nisungtem dang nungi dang alitsüsa, ajungshitepa, lanurtem nem item mapatemji tenzükdaktsü nunga koma süla ?

Aluyimertemi inyakba ama J&K-ia inyaktsüla: Farooq Abdullah



Srinagar, December 05, 2021: National Conference party tentetsang, Sheikh Muhammad Abdullah sor küm 116 ajungba anogomong nung Srinagar nung NC Tir, Farooq Abdullah aser pa jabaso Omar Abdullah na densema party lenirtemi asür nem akhüm agütsüba sülen tangokba noksa nung angur.

Srinagar, December 05 (Agencies): Amongnü National Conference Tir, Farooq Abdullah-i, aluyimba ozüing tasen asem anema longkak aiter aluyimertemi inyakba ama, state jenjang tanaben angutsü atema Jammu & Kashmir nüburtemia inyaktsüsa akümtsü, ta ashi. National Conference party tentetsang, asür Sheikh Mohammad Abdullah sor küm 116 ajungba anogomong nung party youth wing züingsemtem den jembidang Abdullah-i, state jenjang tanaben angutsü aser

Arrla 370 tanaben angutsü atema J&K nüburtemia aluyimertemi inyakba ama inyaka tenla agütsütsüsa akümtsü, ajisüaka party-i raratsübo majungshir, ta ashi. Yaküm November ita nungi tenzüka aluyimertemi tanen makai ozüing tasen asem anema longkak aita aruba sülen tesüsa November 19 nü Ato kilonser, Narendra Modi-i, sorkari aluyimba ozüing tasen asem agientsü, ta sangdonga liasü. Iba dak sendakba nung Abdullah-i, "Aluyimertemi ita 11 longkak ait aser aluyimer 700


dak tema asü. Aluyimertemi tenla agütsüba ajanga sorkari aluyimba ozüing asem agientsüsa aküm. Asenok indang temeden meyipa angutsü atema asenokia tenlatsüsa akümtsü. Iba ya tamadok- asenoki Arrla 370, 35-A aser state jenjang tanaben angutsü atema nangzükogo aser iba atemaji ajak tenlatsü asenok renema lir," ta metetdaksü. 2019 küm August 5 nü Centre sorkari Jammu & Kashmir nung Arrla 370 agien aser Union territories ana kümja liasü.

Delhi nung Covid vaccine anaprong agia alir dak Omicron putet

New Delhi, December 05 (Agencies): Tanzania linük nungi Delhi-i meyipa aruba nisung ka dak coronavirus Omicron variant putetogo, saka pai coronavirus vaccine anaprong agir aliba ajanga iba tashidak temaitsü tera dang keta lir, ta Amongnü Delhi nung aliba LNJP Hospital nung Medical Director, Dr Suresh Kumar-i metetdaksü. Osangbener den jembidang Dr Kumar-i, "Tanzania nungi meyipa arusang terok agi mesaker, temang tashimait aser temang ayang-ashir. Pa ajurua alirtem bushidar. Pai coronavirus vaccine anaprong agir aliba ajanga pa dak iba tashidak temaitsü tera dang keta lir," ta metetdaksü. Paise, tang Lok Nayak Jai Prakash Narayan Hospital nung shiranger 23 mongdar, kechiyong iba hospital ya Omicron treatment atema centre shimogo, ta ashi. Shiranger 23 nungjagi 17 bo bendang linük nungi Delhi-i meyipa arurtem lir. Parnok 19 dak coronavirus putet aser tanüingba 6 jibo contact tracing

asüba sülen amongertem lir. "LMJP nung coronavirus agi shiranga amonger ajakji junga dang lir. Parnok timbaka dak tashidak temaitsü mali. Tanü-a nisung pezü anir aru. Omicron variant putetertem yaritsü atema team ka tenteta lir," ta Dr Kumar-i metetdaksü. LNJP Hospital Medical Director-i ashiba agi, iba hospital nung aliba genome sequencing lab nung anogo shia samples 30-40 shi tendanga aruogo, aser tangbo anogo shia samples 100 tashi tendanger. Omicron variant putetba sülen nungdak apir hospital nung yipten tali bendenloksü; tang Omicron ward nung yipten 40 lir aser doctor team ka tenteta shirangertem methitemi reprangdar, ta Medical Director-isa metetdaksü. Tang tashi nung India nung nisung pongu dak Omicron putetogo. Karnataka nung tama nisung ana dak Omicron putet iba sülen Gujarat kübok Jamnagar nung nisung ka aser Maharashtra kübok Dombivli nunga nisung ka dak iba variant puteta liasü.

Congress medeni opposition teloktepji tamakoktsü: Bhupesh Baghel



New Delhi, December 05 (Agencies): West Bengal Chief Minister aser Trinamool Congress (TMC) tongti, Mamata Banerjee-i, "UPA mali" ta jembiba sülen anogo ishika lir Amongnü Chhattisgarh Chief Minister, Bhupesh Baghel-i, lai (Mamata) sorkar anema raraba ajanga TMC ya tongti opposition party kümner asü kasa Opposition party tem anema raraba ajanga tongti opposition party kümner, ta asüingdang. Paise, linük jenjang nung Congress party medenibo Opposition teloktep yanglutsüji tamakoktsü, kechiyong BJP anema tongti tongshiji Congress lir, ta ashi. Interview ka nung jembidang Baghel-i, 2024 küm general election nung Ato kilonser anema oposition nungi lenirji shiba asütsüar Sonia Gandhi-i aniba United Progressive Alliance (UPA) nung aliba party temi shimsü, ta ashi. Tawa Mumbai nung NCP tongti, Sharad Pawar ajuruba sülen West Bengal Chief Minister Banerjee-i Congress lenirtem aitsüba den külemi "UPA mali", ta jembiba liasü. Mamata Banerjee-i jembiba o dak sendakba nung Baghel-i, "Ni Mamata Banerjee dang ya

asüingdangner, tongti opposition party ji na kümner asü, ibaji kanga junger. Na sentong ka lira, nükjidong ka lira ibaji pelaa agizüker, ajisüaka nai sorkar anema raraba ajanga tongti Opposition party kümner asü Opposition parties anema raraba ajanga tongti party kümner?," ta metetdaksü. Ajungbena TMC-i Goa densema state kar nung assembly election nung shilem agitsü lemtetba dak sendakba nung Baghel-i, item state nung parnoki BJP yariner ama reprangteter, ta ashi. "Goa nung parnok kecha mali saka toktepner. Anungji parnoki opposition votes lemsadaksüner," ta paise ashi. Election asalentong yanglur mongin, Prashant Kishor-i, Congress ji kanga tongtibang saka tongti lenir asütsü atema nija ka (Rahul Gandhi) dak temeden mali, ta jembiba dak sendakba nung Baghel-i, "Prashant Kishor-i sen aatsü atema dang inyaker. Pai BJP atema süaka, Congress, TMC mesüra JD(U) atema süaka election nüboyim atema pai inyaktsür. Pa ya mongin ka, anungji tang pai shiba atema inyaktsürar pai ashitsüla," ta metetdaksü.

Annexure - A & B

GOVERNMENT OF NAGALAND
DIRECTORATE OF WOMEN RESOURCE DEVELOPMENT

LIST OF SELECTED CANDIDATES FOR OPEN COMPETITION ON PREPARED SPEECH ON 6th DEC. 2021


1. Shri. Kaimangchoba	11. Shri. Ovunghung Jungio
2. Smti. Major Ketholebeinu Kuotsu(Retd)	12. Smti. Ithikali Muru
3. Smti. Lihzu Shiney Konyak	13. Smti. Nungsanglila Jamir
4. Shri. Chingong Y. Naga	14. Shri. Ahyulo Khing
5. Smti. Alotoli Ayemi	15. Smti. Mapukla Jamir
6. Smti. Vinita Das	16. Smti. Jenny Kath
7. Smti. Vesulii Rhakho	17. Smti. Nongozono Mekro
8. Smti. Yinjun C.Naam	18. Shri. Rakoyio Chusuna
9. Shri. Mongsentong Longkumer	19. Smti. Asano Tacu
10. Smti. Bangmei Clarissa Konyak	20. Smti. Arhenle Thyu

LIST OF SELECTED CANDIDATES FOR OPEN COMPETITION ON ACRYLIC PAINTING ON 7th DEC. 2021

1. Shri Khriezokhotuo Dzüvichü	10. Shri Mhashi Kennao
2. Smti. Thuisemla Shanglai	11. Smti. Nchumbeni Odyuo
3. Shri. Raju Gurung	12. Smti. Vimenu Patricia
4. Shri. Wulo Akami	13. Shri. Lavituo Chase
5. Smti. Amenuo Khoubeve	14. Shri. Ketouvizo Nakhro
6. Shri. Vimhakho Sotetsu	15. Smti. Medovituo Rutsa
7. Shri. Razukhweto Tacü	
8. Smti. Thejakhrienuo Tunyi	
9. Smti. N. Mhayani Kikon	

Sd/-
(VILONE SAKHRIE)
Director

Indonesia Semeru volcano lendong nung nisung 13 asü



Lumajang, East Java, Indonesia nung aliba Mount Semeru pokteta adoka molushi yimzüka aluba agi tenemtsüng len apu raksatsür aliba noksa ka yangi angur.

Jakarta, Luchii/December 5 (Agencies): Indonesia Semeru volcano lendong nung sabanga aliba nisung ter kümzükgogo, ta linük disaster mitigation agency (BNPB)-i Deobarnü metetdaksü. Iba lendong nung nisung 13 süogo aser aika yirur lir.

Java asetkong nung tenem talangtiba Semeru ya Honibarnü pokteta adokba sülen aut aser mokozü agi iba tenemtsüng nung aliba yimtsüngtem ajak sübang, aser nüburtem tetsübu nung jenshia ao.

Iba lendong nung Lumajang district den Malang yimti sendaktepba apu tongtibangtiba raksatsüba den ki aika raksatsüogo, ta

ketdangsürtemi ashi. BNPB ketdangsür Abdul Muhari-i sangdong ka ajanga ashiba agi, volcano pokteta adokba sülen nisung 13 süogo aser parnok rongnung nisung ana maitsübo jangjaogo. Maneni iba lendong nung mashisa aliba tetsür ana densema nisung 98 yiru aser nisung 902 iba tesem nungi aninogo.

Lumajang nung local ketdangsür Thoriqul Haq-i, lisem aturtem parnok mapa inyakba tesem nung sabanga lir, ta metetdakja liasü.

BNPB-i ashiba, iba lendong nung yirur nisung 35 mozükidang temang anepaludar. Kasa mapang nung Lumajang indang deputy

head-i ashiba agi nisung 41 yiruogo.

Semeru koba süklep 12,000 talang lir iba tenem ya Indonesia nung active volcanoes 130 rongnung ka lir. Iba tenem nung January itaa volcano adoka liasü saka iba lendong nung nisung ka danga taküm mesama.

Indonesia ya "Pacific Ring of Fire" nung lir asünung mapangshia menoknok aser volcano lendong ajangshir.

Tanga tatalokba ka nung Deobarnüsa Halmahera nung menoknok ka anoka liasü, ta European-Mediterranean Seismological Centre (EMSC)-i ashi. Halmahera ya Semeru nungi km 2000 shi pilar anüdoxtip len lir.

Myanmar sepaitemi longkak aitertem dak gari agi atsük; nisung 3 yiru



Yangon nung nüburtem-i banner amer longkak aitba noksa ka ngur.

Mandalay, Luchii/December 5 (Agencies): Yangon nung military-i sorkar atsüngba anema yimjung nung nüburtem longkak aita aliba mapang Myanmar sepaitemi longkak aitertem dak gari agi atsükba sülen nisung asem yiruogo, ta tenük kuli agütsürtemi Deobarnü ashi.

February ita military-i sorkar atsüngtokba sülen linük ajunga nung nüburtemi longkak aita mepetmesü tulu nung arudar aser sepaitemi tashiyim agi item longkak aitertem nokdanga arudar.

Military-i ita 10 dak tema yimsü asüba mapang army anema longkak aiter nisung 1,300 shi tepsetogo, saka nüburtemi maneni longkak aita arudar.

Deobar anepdang Yangon nung longkak aitba sentong ka ayongzüka agia aliba mapang gari tulu kati longkak aitertem dak atsükba sülen parnok senshidaksü, ta osangbener kati ashi.

"Longkak aitertem tonga aruba mapang gari ya takaraba aküm aser lokti adenshia aliba teyongi ai," ta pai ashi.


Paisa, civilian lenir Aung San Suu Kyi pusemertem ishika banner tem amer longkak aita aliba mapang gari yagi parnok tsükshi aser iba sülen parnok jenshi tenzük, ta ashi.

"Iba sülen sepaitem gari nungi alu injang akha tenzük," ta osangbeneri ashi.

Longkak aiter ka kanga mejungi yiruogo aser Myanmar nung osangbener ka densema tangar nisung anaden iba nisungba ya ambulance nung bener ao, ta tenük kuli agütsür kati ashi. Sepaitemi gari agi tsüker aliba nisung asem dak azük tenzük, ta iba tesem nung alir kati ashi.

"Sepaitemi onok dak prangbong agi tuit aser iba tesem nung alirtem dang senshitsu tetuyuba agütsü, anungji onok iba tesem toktsür aotsüsa aküm," ta iba nisungba yagisa ashi.

2023 elections sülen mitkartem politics nungi ainshitsü: Al-Burhan



Abdel Fattah al-Burhan

Khartoum, Luchii/Dec. 05 (Agencies): 2023 nung agitsü aliba elections sülen mitkartemi yimtenren toktsütsü, ta Sudan mitkar tekolakbai ashi.

Honibarnü linük balala nungi osangbener tem den senden balala amenba mapang General Abdel Fattah al-Burhan-i iba osang ya metetdaksü.

October ita tatemlen pai anir mitkartemi sorkar atsüngdoka Sudan nung civilian-i anir democracy dangi meyipba nung timtem agütsü, saka November 21 nung tezüngzüktep ka yanglua Ato Kilonser Abdalla Hamdok tanaben mendaksü,

shibai technocratic Cabinet ka 2023 küm July ita tashi anitsü.

"Kodang sorkar ka shimtetdir, army, armed forces mesüra security forces shingaa yimtenren nung shilem agitsübo ni mebilemer. Ibaji onoki molungtepa lir aser tensaji yamaji lir," ta al-Burhan-i osangbener dang ashi.

Mapang talangka yimsü süa arusang Omar al-Bashir yimli laodaksür lia mitkartemi tashiyim amshia sorkar atsüngdokka ajanga civilian political party den lungjemba rakdang aser ketdangsür aika pua longkak aiter pua

merenshiba atema linük balalai aija liasü.

Committee balala aser political party temi mitkartem dang tangsa yimten yimsüsüba nungi ainshiang ta akhanger aser Hamdok den tezüngzüktep agiba densema jembishinü kecha magizüker. Mitkari sorkar atsüngdokka anema longkak aitba mapang nisung 44 süogo aser parnok ya aika security forces temi prangbong agi yirutsüba ajanga asüba lir, ta doctor temi ashir.

"Longkak aitdang timtem ajurur dak sendakba nung mapa tamajung inyaker jangjateta merenshitsu bushisüngdang tenzükogo," ta al-Burhan-i ashi.

Al-Bashir ya ochimashi aser danga ken o nung tai tonglokja tepuokdak yua lir. Sudan nung temolung melemtetali dangartem den pa ya densema Darfur nung rara mapang mapa tamajung inyakba ken o nung International Criminal Court (ICC) ajanga tai tonglokja bushir.

Mitkartemi atsüngdokka sorkari al-Bashir ya agütsütsü molunga liasü, saka mitkartemi

ano memolungi lir.

"Temolung melemi alirtem okadak nokdaksü atema International Criminal Court den onok angatetepa lir. Tai tonglokja alirtem tim mapa inyaksü atema court den teti jembir," ta al-Burhan-i ashi.

Mitkartemi sorkar atsüngdokka sülen civilian bureaucrats tem anentsü mesüra danga leni yok aser al-Bashir mapang alirtemi melena liasü.

Civilian nem yimsü südaksütsü asoshi inyaktepba maparen nung al-Bashir'er taoba ruling party shilem mali, ta al-Burhan-i Honibarnü ashi.

"Yimya kecha nunga transition nung National Congress Party shilem magidaksütsü atema onoki lungjemer inyaksü," ta pai ashi.

Mitkartemi sorkar atsüngdokka ajanga linük balala nungi teyari agütsüba anena aliba ano maneni salaka Sudan nung rongsenketzung nung mepetmesü tulu adoka lir.

Civilian sorkar ka tentetba sülen linük balalai maneni yaritsü imlar, ta al-Burhan-i

ashi.

"Tang nungi aoba anogotem nung kechi inyaker ta African Union densema linük balalai repranga atar," ta pai osangbener dang ashi.

"Taoba mapang ama tekeratiba nung akumtsü yimya tajung sayur ama ni amanger. Civilian sorkar ka tentetba ajanga akhi ama akumtsü."

Anüolen linüktem aser African Union ajanga mitkari tashiyim amshia sorkar atsüngdokka aija jembiaaka Sudan indang Red Sea tzükum nung naval base ka yanglutsü merangba Russia bo mitkar lenirtem den tesendaktep yanglur, ta diplomats temi ashir.

Iba naval base atema tezüngzüktep tatem kati maru, ta al-Burhan-i osangbener dang ashi. "Iba tezüngzüktep nung meyongnem agütsüba ajanga Russia den asen tesendaktep tali tashi taitba akumtsü imlar," ta pai ashi.

"Maneni shisa agitepba mapang lir aser ajaki agizükttetsüsa aser ozüng agi memela tashi iba tezüngzüktep agitsü atema inyaksü."

Happy Birthday Aba

MR. LONGRINUNGDEN LONGKUMER
Tasoba Anogo: 06.12.1941

Temeim oba tanü na küm 80
ajungba anogo tajung moatsü
nung asen teyanglur Tsüngrem
tenüing asanger.

Oba, na tasü tait alima
wadang tulu koktetba obala na
küm 80 junga taküm arishi
ajangzuktetogo ni.

Na ano arishi talang
moajang ta onoki anon a
atema sarasademtsür.

*Temeim Kinungtsü,
Chirnurtem
aser Semchirtem.*



**Office of the Longsa Lumong Semchir
Bendang Alir Telongjem
HQ- Mokokchung, Nagaland
TENÜNGSANG AGÜTSÜR**

Wb. Sodangsoba & Wt. Nungsangkala, tena jabaso Wb.
Likoknungden -i Sub- Registrar of Co-operative Society
(Cooperation Department) tongtetba asoshi Lumong Semchir
Bendang Alir-i pa nem konang tetushi agütsür. Maneni tarutsü nung
Tsüngremi pa nübur tenzüka wadang nung anema aliba arishi
moajang ta ozü kin sarasadem.

Sd/-
T. Manen
President, LLSBAT

Sd/-
Limongmeren
Gen. Secretary, LLSBAT

Mokokchung nung World Soil Day mungogo



Mokokchung, Luchii/December 05, 2021: DSCO aser staff den KVK keddangsürtem, ATMA nungi teshimtet nübutem aser aluyimertem külemi tangokba noksa ka yangi angur.

Mokokchung, Luchii/ December 05, 2021 (TYO): India nüjiso ngur küm 75 ajungba - "Azadi Ka Amrit Mahotsa" nüngtem nung, Department of Soil & Water Conservation, Mokokchung den KVK Mokokchung longjemer Deobarnü (05.12.2021) DCSO Conference Hall, Mokokchung nung World Soil Day mungogo. Iba sentong ya "Halt soil salinization, boost soil productivity" omen nung ajemdaker agia liasü, ta sangdong ajanga metetdaksü.

Mokokchung district kübok yimtsüng pungo nungi teshimtet nübutem den ATMA nungi keddangsürtem iba sentong nung denogo.

Iba sentong nung DSCO, Mokokchung, Ruokuosietuo Dzuvichu menden liasü. Dzuvichu-i, temo aketba ali (healthy soil) indang tongtibangtem nung rangloksü

aser soil resources tajungba achaayangtsü atema World Soil Day amunger, ta ashi.

Taküm 'World Soil Day' indang omen ("Halt soil salinization, boost soil productivity") ajanga jemiaka, Nagaland tesem ajungalen ali nung acid lir astünung, 'soil acidity' timtem nung tali rangloker inyaksü aser iba tesem (Nagaland) nung 'soil productivity' timba kümdaksütsü asoshi lenmangtem bushia inyaksü, ta pai ashi.

Iba sentong nung Senior Scientist & Head, KVK, Mokokchung, Dr. Keviletsu Khate-i okila jemi, kong aluyimer dang aluyimba nung terenlok alitsü asoshi 'soil health' nung temulung agütsütsüla aser tarutsü nunga iba wadang tajangzük ngua inyaksü atema ali wazüka ayutsüla, ta pai ashi.

Kasa sentong nung, SMS, Agromet, KVK, Mokokchung,

Nungshiyangerla-i District Agromet Unit indang maparen Powerpoint ajanga metetdaksü.

Iba sülen, Soil fertility aser Soil pH indang tongtibangtem nung film ka sayu aser SMS (Soil Conservation) KVK, Mokokchung, Imtilemla ajanga telok den sensaksem sentong ka ayongzüka liasü.

Maneni, iba sentong nung adener - Aliba, Mopungchuket, Changtongya (N), Longkhum aser Longmisa yimtsüng nungi teshimtet nübu nem Soil health card aser pamphlet tem lema agütsü.

JSCO, Mokokchung, Toshinenla-i tepela anküp o jemi. World Soil Day anogomung nüngtem nung Awareness campaign ka ayongzük, koba Mokokchung jila kübok tongtibang tesemtem nung poster aser banner tem maloka senzü, ta kasa sangdong nung shia lir.

Khasi Students ' Union-i khu khua aitsür

Dimapur, Luchii/December 05, 2021 (TYO): Honibarnü (04.12.2021) Mon District kübok Oting yimtsüng nung Assam Rifles-i tai malir Naga nunger dang taochi mesayui tepsetba osang angashia jashir aser iba ama maparen Khasi Students ' Union (KSU)-i khu khua aitsür, ta sangdong ka ajanga Khasi Students' Union, General Secretary, Donald V Thabah-i metetdaksü.

Assam Rifles-i ozüing agi memelaba, kecha kuli mekai aser tashiyim agi inyakba ajanga Konyak kin nungi tai malir nisung 15 tashi anojungi iba akümlü nungi pilaogo.

Iba lendong nung taküm samar kibong den KSU-i

mangyim jashi lemsateper. Ochi obendang agütsütsü aser meimchir shisatsü agi magizüktsüsa inyakba maparen anema raratsü asoshi Naga nunger den longjemer nokdaksü, ta Union-isa metetdaksü.

Northeast nung Indian Army-i taochi mesayui aser tasüita/temulung ulua nübürttem tepsetba ya ozüing tesashi - Armed Force Special Powers Act ajanga lir, koba Indian Army-i inyaknüdang/mulungtetdang nisung mashi ka aputsü mesüra tepsettsü atema parnok dang melaba ozüing ka ama lir.

Anungji, Northeast tesem

nung tanaben yimji-yimjung alitsü atema, India Sorkari 'AFSPA' agientsüla aser iba melen Northeast India nung alir lisopurtem temeden kümzüka ayutsü asoshi ozüing yanglutsüsa. GOI-i atangji nunga iba tesem (Northeast) nung alir kintem atema aria bilemetsüra, tekalen agüja aliba lendong nung azü tokshiba maparen nung dena alirtem nem temerenshi tapet agütsütsüla.

Maneni, Burma nung aliba Tatmadaw regime ama nokdangtsü atema, Northeast tesem nung sepaitem yokba aser military amenokba maparen ajemdaksütsüla ta KSU-i bilemba ka lemsatep.

**KOHIMA ONGPANGKONG KAKETSHIR TELONGJEM
KÜM 25 JUNGMUNG 2021**



Nakmen Rajemshidi

ANOOGO: 10.12.2021 | MAPANG: 10:00 AM | TESENTEPDAK: MOLU KI

JUBILEE MERAKETSÜR:
WB. METSUBO JAMIR
MINISTER
RURAL DEVELOPMENT
GOVERNMENT OF NAGALAND

TONGTI O JEMBIR:
WB. IMNA ZULU JAMIR
ASSOCIATE PASTOR MISSION
KOHIMA AO BAPTIST AROGO

DDGBA-i khu khua aitsür

Dimapur, Luchii/December 05, 2021 (TYO): Honibarnü, Mon District kübok Oting yimtsüng nung lendong tulu atalokba osang angashia Dimapur District GBs Association aoksar, kong nagmati atuba tesem nungi pei yimtsüing meyipa aruba mapang Assam Rifles-i mita atar, tai malir yimer 2 yirutsüba den nisung 13 khaset, ta sangdong ka ajanga DDGBA, President, Khehovi V Chophi aser DDGBA General Secretary, Ponghok Phom nati metetdaksü.

Kecha kuli ka mekai mesüra tai maliba atema anogoshia ayangertem tepsetba ya tanga

kecha masü, saka kiralongrarba maparen ka lir, koba mapang talangka nungi tai malir Naga nunger dak security forces-i iba ama mapa inyaka arudar.

Iba ama maparen ya senso tajung ajaki otia aitsütsüla aser iba ama kiralongrarba maparen ajanga tai maliba taküm samartem nem ochi obendang agütsütsü atema sorkari mera tapet agitsüla, ta DDGBA-isa ashi.

DDGBA-isa iba lendong nung taküm samar kibong züngsemtem den asükhü lemsateper aser yirur alirtem yakta taneptsü angutsü asoshi sarasademtsür, ta kasa sangdong nung shia lir.

Kezhaseluo Pienyii-i international Naga wrestling championship kokogo



Dimapur, Luchii/December 5 (TYO): 14buba Naga wrestling championship December 4 Amphi Theatre, Kisama nü asayaogo. Iba sentong nung Advisor Youth Resources & Sports, Er. Zale Neikha alakteta jaoker liasü. Sentong nung o jembiba mapang Neikha-i, Naga wrestling ya Naga nunger sobaliba asaya rongnung tejentiba ka lir aser state nung sen timtiba aaba asaya lir, ta ashi. Saisapong ya senotsü aika aazükba industry kümogo aser asayar tajung kaji linük ambassador ka kümtettsü, kechiyong

takok tajung ngutetba asayar kati linük nem konang tetushi bener arutsür, ta pai ashi. Maneni pai NWA dang temaba jenjang nung Naga wrestling ajungkettsü aser tanga Naga kintema tejakdangi arua asayamung ajak nung shilem agitsü ajungshia liasü. 14buba international Hornbill Naga Wrestling Championship Kezhaseluo Pienyii-i ayongzükogo. Pa nem senpet sen 1,20,000 agütsü. Tetoktepba nungsa first runner-up, Dzieselatuo Keretsu nem senpet sen 80,000, second runner-up Atuo

Tevo nem senpet 40,000 aser third runner-up Kekhriezo Nagi nem 20,000 agütsü. Amateur/Tourist category nung tetoktepba Shekho Veiniwon-i akok aser pa nem senpet sen 30,000 agütsü. Iba tetoktepba nung runner-up Moses Puomai nem senpet sen 20,000 aser semi-finalists ajak nem senpet sen 10,000 (asayar shia) agüja liasü. Asaya lapokba sentong ya Press secretary NWA, C. Theyo lenisüba nung agi aser asayartem tenangzüktepba agiba sentong Jt. Secretary NWA, Amos Zeliang-i achaayanga agia liasü.

NAAME-i adventure sports balala asayatsü maongka agütsür

Dimapur, Luchii/December 5 (TYO): Nagaland Association for Adventure Mountaineering & Education (NAAME)-i, tang munga aliba Hornbill benjung mapang Children's Park,

Kisama Heritage Village nung tanur tain ajak atema adventure sports activities balala amenoka lir. Adventure sports tem rongnung Ziplining 350 mtrs &

100 mtrs, Giant Bouncy Castle, Body Zorbing, Air Rifle, Artificial Wall Sports Climbing, Trampoline, Play Golf, Sky Walk aser Spider Web densema lir.

Jesse Marsch-i Leipzig head coach mapa toktsüogo



Luchii/December 5, 2021 (Agencies): RB Leipzig indang head coach Jesse Marsch-i tangatetep nung club toktsütsü telemtetba agiogo, ta club sangdong ka ajanga Deobarnü metetdaksü. Hokolbarnü Union Berlin goal goal 2-1 agi makokba sülen Leipzig pur asaya asem atonga tamakok nguogo aser parnok dang jenjang 11buba nung lir aser iba ajanga America nunger coach nem ya tali pressure

agütsü. Marsch, shibai iba season Julian Nagelsmann melenzüka liasü, pa lenisüba nung par team-i league asaya 14 nung pongu dang koka liasü. "RB Leipzig aser head coach Jesse Marsch-i na tangatetep nung club toktsütsü mulungtepogo. Union Berlin den asaya sülen ken o kanga junga asadanger iba telemtetba agiogo," ta club sangdong ajangsa metetdaksü.

Assistant coach Achim Beierlorzer lenisüba nung Champions League nung parnok Manchester City den asayatsü. Taoba küm CL nung parnok semi-finals tonga asayaogo ajisüaka takumbo tsükatokogo. "RB Leipzig taoba mapang ama takaratiba nung tashi ita akümtsü ni Club, team, staff aser fan tem atema inlaja atar. "Team aser club jenjang kanga tajung aser club-i parnok nukjidong tongtetsü ta ni amanger," ta Marsch-i ashi. Taoba US nunger international asayar Marsch-i Austrian league nung Leipzig indang sister club RB Salzburg, Cup titles ana tashi takok dangi aniba sülen Europe nung pa tenüjung jangjaa aküm. Pa Europe indang elite club tetoktepba nung America nunger rongnungi mezüngbuba coach liasü. Leipzig-isa, Marsch melenzüktsüpur tarutsü nung sangdongtsü ta metetdaksüogo.

World Tour Finals: PV Sindhu-i silver angu

Luchii/December 5, 2021 (Agencies): BWF World Tour Finals nung Deobarnü India tsürtem rongnung nungtugu badminton asayar PV Sindhu-i South Korea tsür An Seyoung makokba sülen silver medal dang nguteta liasü. Deobarnü final asaya nung Seyoung-i 16-21 12-21 agi Sindhu madak takok ngua liasü. Final nung taoba world championship koker alila Sindhu-i world number 6 An Seyoung den jenjang ka nung liromedema masayatet aser Seyoung-i tetenzük nungi asaya amokbanger asayaa lai asaya akok. Seyoung-i mapang tatsüka kanga junga asaya arudar aser taoba asayatem nung ama final

asaya nunga net nung aser baseline nung kanga junga asayar aser Olympic anaben tashi koker aliba India tsürta yagi la den toktepa masayatet. Tena tsüngda asaya minute 39 nung tembanga liasü. Season-ending tournament masaya tsüngda Seyoung-i Indonesia Masters aser Indonesia Open ta asayamung tongtibang ana atonga koker liasü aser October itaa lai Denmark Open nung Sindhu kokogo. Taküm final densema Sindhu-i iba asayamung nung tanga agi tasembuba final tonga asayatetogo. Lai 2018 küm iba asayamung koka India nunger badminton asayartem rongnungi iba asayamung akokba mezüngbuba asayar aküm.

Kohima nung Go Kart race tetoktepba asayaogo



Dimapur, Luchii/December 5 (TYO): Kohima nung December 5 nü 4buba Go Kart race asayaogo. Iba tetoktepba ya PHQ Junction nung tenzük aser Old MLA hostel junction nung tembanga liasü. Iba tetoktepba ya Nuhu Thira (27 Yrs) aser Muzikho Puro (20 Yrs) na koka liasü. Tanabuba aser tasembuba jenjang nung Onuzo Puro (21 Yrs) aser Sehuto Puro (20 Yrs) na aser Chikrosuto Vero (24 Yrs) aser Vezota Thira (35

Yrs) nunger liasü. Takokertem ajak ya Phek district kübok Kikruma yimtsüng nungi liasü. Tetokteper rongnung Noklak district nungi Homo (14 Yrs) aser Khaiko (13 Yrs) na tanobuti liasü. Taküm iba tetoktepba nung team 19-i shilem agi (team shia nung nisung anan). Iba asaya ya Go Travels-i ayongzük aser Department of Tourism, Government of Nagaland-i senotsü teyari agüja liasü.

Cummins-i mezüngbuba Test atema asayartem sangdongogo

Luchii/December 5, 2021 (Agencies): Pat Cummins, shiba tawa Test asaya nung Australia team captain asütsü shimogo, pai mezüngbuba Ashes Test atema asayartem sangdongogo. Mezüngbuba test ya Gabba, Brisbane nung December 8 nü nungi tenzüka asayatsü. T20 World Cup nung kanga junga asayaba sülen Marcus Harris den David Warner-i opening batsmen ama shilem agitsü. Tim Paine-i Test captain mapa toktsür tang asaya nungi anisüngzüka aliba mapang team nung Alex Carey wicket-keeper asütsü shimogo. Australia-i pace bowler asem dak tamang yuogo, shirnoki Test nung wicket 631 agia lir. Pat Cummins captian asütsü shimba sülen bowling nung Mitchell Starc aser Josh Hazlewood nati pa nongita yaritsü inlar. Tanga mapang nung ama

Australia squad nung spinner Nathan Lyon kija asütsü. Team nung Steve Smith vice-captain asütsü. England captain Joe Root-i tanga tashi asayartem sangdonga mali, saka mezüngbuba Test atema left-arm spinner Jake Leach shimtsü akok ta shiogo. Joe Root-i ashiba agi, "anogo ana tsüngda forecast aser pitch melenshiba asadanga alitsü nungdaker. Ajisüaka iba tesemya spin asayatsü asoshi kanga tajung. Onoki iba ya benoka asadangtsü, saka tangbo telemtetba magitetsü." Australia team nungi asayartem: Marcus Harris, David Warner, Marnus Labuschagne, Steve Smith, Travis Head, Cameron Green, Alex Carey (wicketkeeper), Pat Cummins (captain), Mitch Starc, Nathan Lyon, Josh Hazlewood.

BILEMDANGANG

"Telongjem nung tashi lir."